

Taitos na letama

Pol na waikaiwama

Kapore Taitos,

¹ Taugu Pol, Mamaitua na taunoyama be Yesu Keriso na apasolma. Bada taugu ya vineguna da Mamaitua na vinevinema, banegidima yà sagudi da adi waisumağama èì rewa panana. Be mate riukaua yài katakataidi da taudi Mamaitua na ġoane ta miana. ² Inam waisumeġine tauda tè kataiena da tokare yawasana kenakena nonoġinama tà paġona, vutuna Mamaitua boni ya sausaugena, muriġa da yaba matabuna yai tubuġidina. Be Mamaitua nam airaġan e kaiyovueda. ³ Be raġan boruborune tauna inam varinama yai maġatarina. Be Mamaitua tauwai yawasanidama ya vineguna da taugu inam varinama banaga ġarodie yà rauguguyena.

⁴ Tam Taitos ġarome uma letanama yà girugirumina. Am waisumaġe tam taugu natuġomiguma. Tamadama Mamaitua be tauwai yawasanidama Yesu Keriso adi raukiviverema be adi subama ġarome ta kenana.

Taitos Kret nōpone ekalesia babadidima e vine-dina

⁵ Tam Kret bonabonane è gosemna, baninama dà noyama kwa kaiġavutinama aubainama, tam meagai da meagai nopodiġa kwa naġo be ekalesia

adi babadama kwa vinedina. ⁶ Be ekalesia debanama tauwai badenama tauna sibo tauḡoma, be tauna na yawasanama sibo umanama:

- Tauna yawasana didimanine e mia be nam aba e voia waigewa da banaga tai giugie.
- Be tauna waivi tenaḡa e naḡi be vutunaḡa e rabena.
- Be na sedama sibo waisumeḡidima be nam beapoteptedi be rawarawa ḡaiḡaidi.
- ⁷ • Be mate ekalesia debanama tauwai badenama tauna Mamaitua noya ya utena aubainama umanama yawasanidie sibo ya miana.
- Tauna yawasana didimanine e miana, be nam aba sibo ya voia waigewa da banaga ai giugie.
- Be tauna nam e kawa saḡe munaḡe be banaga matedie e rauguyaguyau,
- be nam meditupo banegina,
- be nam tegobua banegina,
- be nam sorukeakea banegina,
- be nam kaiyovue e raraу mane bo e raraу purapura.
- ⁸ Be banaga na vadae ta tavatavana taurabe kauedima.
- Be tauna yawasana veredima tauḡoedima.
- Be inam baneginama tauna miamia genuaninama, be nam voivoia yababayababina,
- be tauna na noḡotama matabudi didimani-diḡa,
- be tauna Mamaitua na ḡoane nama e mi-anana,
- be na yawasanae tauname e rabe munaḡena.

• 9 Ekalesia debanama tauwai badenama tauna Mamaitua riunama awai katakataina, vutudi e kaidididi da bagibaginaā. Inam raāgnine tauna tokare teneāinama da inam waikatakataidie sibo banaga āgesaudima mate yai katakataidi be ya riutuaāgiedina. Be riukaua tauriutuatuāgaienama banegidima, dabudi ta kita be ta kataie da taudi inam ta kaikaiyovuna.

10 Baninama banaga toitoi riukaua tauriutuāgaienama be tauboru waideā banegidima ta miamiana. Inam kaua Jius banegidima adi voia āgomama nama, taudi ta riuriuna da banaga tarawatu tai muriwatanena, yodibe yawasana ta paāona. Be inam giudima matabudi kaiyovu. 11 Inam banegidima kwa riutuaāgiedina, baninama taudi adi waikatakataima kaikaiyovune dam toitoi adi waisumaāgama ta kawakawa gewegewedina. Inam tauwai katakatai kaikaiyovudima maneāga tawai matanedina. 12 Boni nuauyauya baneginama tenaāga Kret nopone tauna umanama ya riuna, “Kret banegidima taudi matabudi kaikaiyovudima, kivikorokorodima, matagayagayawidima be kaniposa banegidima.” 13 Inam riukaua. Vutuna aubainama kwa riutuaāgai vavasaāgedi be kwa voiedi da adi waisumaāgama Bada āgarone ei rewapanana, 14 be nam Jius adi giuma kaikaiyovudima bo adi tarawatuma tai beavaiedi. Be banaga aitaūāga riukaua taumia tautaurienama nam adi giuma ta vaiedi be tai muriwatanedi.

15 Aitaūāga nopolie nam mira, taudi āgarodie yaba matabudi nam miremiredi. Be aitaūāga

nopodie mira be nam timawai sumaḡana, taudi ġarodie yaba matabudi miremiredima, baniama taudi nopodima be adi noġotama a mirana. ¹⁶ Taudi ta riuriuna da Mamaitua kabe ti katakataie, be adi yawasanama ewai maġatāridina da taudi Mamaitua nam ti kataieno. Taudi rawaġaīgai banegidima be banaga tawai mataravuġeidina. Taudi nam tokare aiyaba verenama ta voie be teneteneġina, ibewa ġoma.

2

Waikatakatai verenama animia kaua aubainama

¹ Waikatakatai verenama ruvane, nama banaga kwai katakataidina. ² Tautaugħoma poredima kwai katakataidi da taudi sibo a mia genuanana be nam a voia yababayaba. Be taudi banaga viviviredima sibo a mia be taudime a rabe munaġedina. Be adi waisumaġħama sibo yai rewapanha be nopodima wainuapaġo ya moġavuna, be piripiri raġandie nuedima sibo a taibagina.

³ Be kauinama teneġinama waiwaivi poredima nama kwai katakataidi da taudi sibo viviviredima a miana, Bada na tauwai muriwatanama maika. Be taudi nam sibo awai mena be nam sibo a tegotego bua, inam avedi. Be taudi waikatakatai veredima sibo a voivoiedina. ⁴ Uma waiwaividima poredima taudi sibo waiwaivi vaudima ai katakataidi da taudi sibo adi tautaugħomma be adi sedama ai nuapaġoedina, ⁵ be mate taudime sibo a rabe kauedi be nam tautaugħoma ġesaudima mate ai naġo dobira. Be mate adi vadae sibo ai rabaraba kauana. Raġan

matabuna kividima sibo a vere, be adi tau-taugomama adi waibadama dibune sibo a miana. Inam kauine banaga tokare Mamaitua riunama nam tai kwatekwateve.

⁶ Be kauinama teneğinama yarayaraga kwai katakatai yağedi da taudime sibo a rabe kauedin. ⁷ Be tam yawasana veredima kwa voiedi da taudi dabudine ta kita be tai muriwatanemna. Waikatakataidima rağanine, tam didimanae be riukaue kwai katakataina, be bonama ei rewapanana nam kwai digidigiriedi. ⁸ Be am waikatakataima sibo ya didimana be ya vere vavasağana. Inam rağanine banaga tokare nam teneteneğina da ta riu tuatuağaiem. Be tauriu tuatuağaiema tokare ta tunimayağana, baninama taudi nam aba gewagewanama ġarome ti vaiena da ta giue.

⁹ Taunoya yababa kwai katakataidi da yaba matabuna ġarone adi babadama adi waibadama dibune sibo a miana. Be taudi a raurubu da adi babadama sibo a kawa nuaveredina, be nam ġarodie a riu viravira. ¹⁰ Be taudi nam adi babadama ġarodie sibo a danedanene, avedi. Be taudi adi yawasanae adi babadama sibo a kitedi be a kataiedi da taudi naumeki taunoya patututudima. Inam kauine tokare Mamaitua tauwai yawasanidama riunama banaga nuedima e soruna.

¹¹ Mamaitua na raukiviverema kaite ya mağatarana banaga matabudi ġarodie. Be inam raukiviverene banaga tokare yawasana ta pağona. ¹²⁻¹³ Inam kedane Bada e riuriuedana da gewagewa be dobu adi wainuaverema nam sibo tèi muriwatanedi avedi, be didimanae tà

mia be tà rabe munaḡedana. Be Yesu Keriso, tauna vutuna Mamaitua dosinama be tauwai yawasanidama tà raberabena maika, tauda uma dobune Mamaitua na ḡoane nama tà miana. Tauda tè kataiena da tauna ma borumina be ma neneḡarinā e maḡatarana. ¹⁴ Tauna vutuna na yawasanama yai uta munaḡenā tauda aubaidama, be dà gewagewae ya kuvesida be nopodama ya koḡa porena. Inam kedane tauda yodi tauna na banaga ḡomama tè tubuḡana, aubainama tauda vere voiedima tà ḡoeḡoe kauedina.

¹⁵ Inam giudima vutudi banaga kwai katakataidi be kwa duḡudina. Be deḡoda aitau gewagewae e naḡonaḡona, tauna kwa riutuağaiena, baninama tam rewapanā ḡarome. Be nam aitau e kita waiyovoḡem.

3

Vere ko voie

¹ Banaga kwa riu wainoḡotidi da waibabada be gabeman adi waibadae sibo a mia be a voteyeteyedina. Be taudi raḡan matabuna sibo yaba verediḡa a voivoiedina. ² Be taudi nam aitau ḡarone sibo awai mena bo nam awai kawa ḡasigasi, avedi. Be taudi adi banagama mate sibo a voyaḡota be ai turana kauana.

³ Tauda mate boni bua na miane tè miamiana. Inam raḡanine tauda Mamaitua tè rawarawa ḡaiḡaie be banaga awai kedadoka waigewadana. Be tauda dobu be tubuḡa adi ḡoane tèwai

yaragana. Be dà yawasanama gewegewedima maika unura be waikawa gadogai nopo-dama ya moğavuna. ⁴ Be Mamaitua tauwai yawasanidama na raukiviverema, be na wain-uapağoma ya mağatarana rağanine, ⁵ tauna yai yawasanidana. Inam nam dà verema aubainama i yawasanidana, ibewa da na raunuatoie yai yawasanidana. Mamaitua dà gewagewama ya koğa porena rağanine, tauda tè tubuğा vitara be Arua Babaue yawasana vaunama ya utedana. ⁶ Baninama Yesu Keriso tauwai yawasanidama aubaidama ya gurina aubainama, tauna Arua Babau debade ya ġini porena. ⁷ Tauna na raunuatoie ya kawa didimanidana, aubainama yodi tè kataieno da tauda tokare yawasana kenakena nonoġinama tà paġona. ⁸ Uma giudima yà riuriuemna, inam matabudi riukaua. Be taugu yà ġoeġoena da inam giudima kwa giu guratana aitauğā Mamaitua tawai sumaqenā ġarodie, yodibe taudi ta kita kaua da rağan matabuna yaba veredīga ta voiedina. Inam yabedima veredima vutudi tokare banaga ta sagudina.

⁹ Be banaga giu buebuedima debedie tawai saġasāġana, nam kwai beavaiedi. Be mate aitauğā kimta poredima ġarodie yawasana ta kerikeri wanedi be Mousis na tarawatuma mate debedie tawai kawa riuriuna, nam kwai beavaiedi. Inam giudima nam banibiribiridi, be giudima tokare nam aitau ta sagu. ¹⁰ Be banaga aitau da ekalesia e daridariġena, inam baneginama rağan tenağā bo rabui nama kwa riutuağaiena. Be degoda e raukosogaiġaina, naumeki da kwa kita yababena, be nam mate koi

popo. ¹¹ Tam kuya kataiena da inam nama banegidima taudi gewagewa da gewagewa nopolima ya moğavuna, vutuna aubainama taudime adi gewagewama ewai mağatarana da taudi gewagewa banegidima.

Pol na giuma damonama

¹² Rağanine taugu Atemas bo Taikikas yà ri-uporena ġarome, kwa raurubu da Nikopolasma ġarogue kwa tavana, baninama yau ogama è tarägina da bodubodue taugu inam dabudine yà miana. ¹³ Kwa kita da tarawatu kana badama Senas be Apolas adi ġoanama matabuna kwa sagudina vaġai aubainama. ¹⁴ Tauda dà banagama aitaugħa waisumeġidima, taudi nam sibo a mia yababayababa. Taudi vere sibo voiedima a kataie da banaga waikaruwaġewaġedima sibo a sagusagudina.

¹⁵ Banaga uma dabudine ka miamiana, matabudi tam tawai kaiwemna. Be inam dabudi aitaugħa waisumaġe tawai nuapaġoemainā, kwa riuedina tauma kawai kaiwedina.

Mamaitua na raukiviverema matabumi ġaromie.

**Vari Verenama
The New Testament in the Dawawa Language of
Papua New Guinea
Nupela Testamen long tokples Dawawa long Niugini**
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020

9b8bda32-db42-5be3-9d24-4e4a5d5f65b2